

**Siunnersuut uunga: Piniarneq aallaaniarnerlu pillugit Inatsisartut inatsisaat  
pillugu**

**Aalisarnermut, Piniarnermut Nunalerinermullu Ataatsimiititaliap**

**siunnersuutip aappassaaneerneqarneranut**

**ILASSUTITUT ISUMALIUTISSIISUTAA**

*Aalisarnermut Piniarnermullu Naalakkersuisumit saqqummiunneqartoq*

Ataatsimiititaliap suliarinninnermini kingusinnerpaamik ilaasortarai:

Inatsisartunut ilaasortaq Hans Aronsen, Inuit Ataqtigiit siulittaasoq  
Inatsisartunut ilaasortaq Jens Napâtôk', Naleraq, siulittaasup tullia  
Inatsisartunut ilaasortaq Agathe Fontain, Inuit Ataqtigiit  
Inatsisartunut ilaasortaq Adam Kristensen, Inuit Ataqtigiit  
Inatsisartunut ilaasortaq Jens Kristian Therkelsen, Siumut  
Inatsisartunut ilaasortaq Lars Poulsen, Siumut  
Inatsisartunut ilaasortaq Jens-Frederik Nielsen, Demokraatit

22. marts 2022 UPA2022-mi siullermeerneqarnerata kingorna siunnersuut ataatsimiititaliamit suliarineqarpoq.

**1. Siunnersuutip imarisaa siunertaalu**

Kalaallit Nunaanni piniarneq aallaaniarnerlu pillugit Inatsisartut inatsisaannik paasiuminartumik, ullutsinnut nalequttumik atoruminartumillu pilersitsinissaq piniarnermut aallaaniarnermullu inatsimmi nutaami pingaarnertut siunertaassasoq Naalakkersuisunit nassuiarneqarpoq. Nunatta piniagassatigut pisuussutaanik nalequttumik nungusaataanngitsumillu atuinermik aallaaveqartumik kiisalu aningaasaqarniarneq suliffissaqartitsiniarnerlu mianeralugit Kalaallit Nunaanni inuiaqtigiit malittarisassanik peqarnissaat inatsimmi qulakkeerneqassaaq.

Kalaallit Nunaanni Aalisarnermik Nakkutilliisoqarfik sakkussaannik nutaanik arlalinnik nakkutilliisutut oqartussaaneermi ajornannginnerulersitsisinnaasunik atortulersorneqarnissaaq, taamaalillutik inuit ingerlatseqatigiiffillu piniarnermik aallaaniarnermillu malittarisassanik unioqqutitsisunik ajornannginnerusumik pineqaatissiiinnaasarniassammata.

**2. Siunnersuutip Inatsisartunit siullermeerneqarnera**

Siunnersuut siullermeerneqarnerani taparserneqarneruvoq, ilutigalugulu aaqqiissutaasinnaasunik siunnersuuteqartoqarluni, taakkulu Aalisarnermut, Piniarnermut Nunalerinermullu Ataatsimiititaliami eqqartorneqarsinnaasut.

### 3. Tusarniaanermut akissutit

Siunnersuut ulluni 11. december 2020-mit 15. januar 2021 tungaanut tusarniutigineqarpoq.

Tusarniaanermut akissutigineqartut inatsisissatut siunnersuummut ilanngunneqarput, taakkulu Inatsisartut Siulittaasoqarfianit piumasaqaatinut naapertuullutik.

Tusarniaanermut akissummi ima allaqqasoqartoq ataatsimiititaliamit maluginiarneqarpoq, ” tusarniaanermi akissutit taamaallaat pingaaruteqarneranik naliliineq tunuliaqutaralugu pingaarnersiorlugit issuarneqarmata”. Tusarniaanermut akissutit nassuiaatigineqartillugit taamatut ingerlariuseqarnissaq akornutissaqanngilaq.

Kalaallit Nunaanni Politiit tusarniaanermut akissutaasa ilaat mininneqarsimasoq ataatsimiititaliamit maluginiarneqarpoq.

Taamaattumik piniarnermut aallaaniarnermullu inatsit pillugu politiit tusarniaanermut akissutaat ataatsimiititaliamit nassiuuteqqullugit piumaneqarnikuupput. Taanna allagaq matumunnga ilanngussatut kakkiunneqarluni, **ilanngussaq 4.**

### 4. Siunnersuutip ilusiligaanera

Inatsisissatut siunnersuummi § 5, imm. 1, ima allaqqasoqarpoq:

”§ 5. Kalaallit Nunaanni Aalisarsinnaanermut Akuersissutinik Nakkutilliisoqarfiup, nakkutilliinermut oqartussaasutut, Inatsisartut inatsisaanni kapitali 7-imi aalajangersakkat eqquutsinneqarnersut nakkutilliiffigisarlugillu misissuiffigisarpai.”

Inatsisissatut siunnersuummi kapitali 7, § 38, imm. 1 ima allaqqasoqarpoq:

”§ 38. Inatsisartut inatsisaannik uuminnga imaluunniit Inatsisartut inatsisaat una naapertorlugu maleruagassat atuutilersinneqarsimasut eqquutsinneqarnerannik nakkutilliinissamut pisariaqassappat, suliffeqarfinnut, angallatinut nunakkoortinullu, siumoortumik eqqartuussiviup aalajangiussaanic peqanngikkaluarluni kinaassutsimut uppernarsaammik pissusissamisoorlum takutitsinikkut, Nakkutilliinermik oqartussaasoq sukkulluunniit ikisinnaavoq.”

Siunertaasoq tassa imaappoq, Nakkutilliinermik Oqartussaasoq inatsisartut inatsisaanni kapitali 7 saniatigut, tassunga ilaallutik malittarisassat inatsit malillugu sananeqartut, aalajangersakkanik allanik nakkutiginnillunilu nakkutilliisuusussaq.

Taamaattumik § 5-imi aalajangersakkat allassimaneri allanngortinneqassasut siunnersuutigineqarpoq, taarsiullugu ima ersarissumik allaqqalerniassammat, Kalaallit Nunaanni Aalisarsinnaanermut Akuersissutinik Nakkutilliisoqarfik nakkutilliinermik oqartussaassuseqartuusutut inatsisartut inatsisaanni aalajangersakkat malittarisassallu inatsisartut inatsisaat malillugit sananeqartut malinneqarnersut nakkutiginnillunilu

nakkutilliisuusussaasoq.

Inatsisissatut siunnersuutip danskisuuani § 12, imm. 3-mi oqaaseq ”en” oqaaseqatigiinni uani ”såfremt der i det pågældende forvaltningsområde er **(en)** åben kvote” amigaataavoq.

Inatsisissatut siunnersuutip danskisuuani § 12, imm. 4-mi oqaaseq ”og” oqaaseqatigiinni uani ”Naalakkersuisut kan stille krav til besiddelse af nødvendige fangstredskaber **(og)** fartøj ved fordeling af licenser og tilladelser til kvoterede arter” amigaataavoq.

Ataatsimiititaliap inatsimmut siunnersuummi qulaani allassimasumi amigaataasut iluarsineqassasut Naalakkersuisunut kaammattuutigivaat inatsimmullu siunnersuutip aappassaaneerneqannginnerani allannguutissatut siunnersuummik saqqummiussissasut aamma ilanngullu.

## **5. Aallartitat**

Inatsisissatut siunnersuummut oqaaseqaatit tunngavigalugit januarip 17-iani Tasiilami **KNAPK**-p immikkoortortaarfia ataatsimiititaliamit sassartinneqarpoq.

## **6. Ilisimatitsiffiusumik ataatsimiinnerit Naalakkersuisunullu apeqquteqarnerit**

Aalisarnermut Piniarnermullu Naalakkersuisoq aprilip 29-ani 2022 ataatsimiititaliap suliarinninnermini ilisimatitsiffiusumik ataatsimeeqatigaa. Ilisimatitsiffiusumik ataatsimeeqatigiinnissamut aggeqqusissutip aammalu Aalisarnermut Piniarnermullu Naalakkersuisumut ataatsimiinnermi apeqqutinut akissutit assilineri isumaliutissiissummut matumunnga **ilanngussat 1-itut aamma 2-tut** kakkiunneqarput.

Tamanna pillugu ulloq 29. april 2022 ilisimatitsiffiusumik ataatsimiinnermut ilanngullugu ataatsimiititaliaq malitseqartitsilluni tapiliussatut allakkatigut akissuteqaammik tigusaqarpoq, taakkualu **ilanngussaq 3-tut aamma ilanngussaq 4-tut** kakkiunneqarput.

Tamanna pillugu ataatsimiititaliaq allakkatigut apeqquteqaqqippoq. Ataatsimiititaliamit apeqqutit aamma Aalisarnermut Piniarnermullu Naalakkersuisumit akissutit 16. marts 2023-meersut **ilanngussaq 5-itut** kakkiunneqarput.

## **7. Ataatsimiititaliap siunnersuummik suliarinninnera**

### **7.1. Akuersissutinik atulersitsineq**

Inatsisissatut siunnersuutip suliarinerani ataatsimiititaliap inuussutissarsiutigalugu piniartunut akuersissutinik atulersitsisarneq oqallisigaat (§6, imm. 2). Ataatsimiititaliamit kissaatigineqarpoq sumiiffinni inuussutissarsiutigalugu piniartunut akuersissutinik atulersitsinissami piniartut peqatigiiffii tusarniarneqartassasut.

### **7.2. Qassinik ukioqarnissamik killigitat:**

Siunnersuutip siullermeerneqarnerani piniarnermut allagartaqarniaraanni qassinik

ukioqarnissamik killigitinneqarsinnaasut assigiinngitsut eqqartorneqarput. Qassinik ukioqarnissamik killigitinneqarsinnaasut siunnersuummi taaneqartut ataatsimiititaliap suliarinninnermini aamma eqqartornikuuai:

Inatsimmut siunnersuummi qassinik ukioqarnissamik killigitinneqartut:

Aqqaneq-marluleereersunut – sunngiffimmi piniartutut allagartaq (§ 9)

15-inik ukioqalereersunut – sunngiffimmi piniarnermut akuersissut aammalu piniagassanut pisassiissutaasartunut sunngiffimmi piniarnermut akuersissut (§ 14, imm. 1)

15-inik ukioqalereersunut inuussutissarsiutigalugu piniarnermut allagartaq (§ 7, imm. 1)

Sunngiffimmi piniartut 13-15 akornanni ukiullit inersimasumik ilaqlartutik tuttunniarsinnaassasut siullermeerinninnermi siunnersuutigineqarpoq. Tamanna pillugu eqqartuinnermi perngarnissamut atatillugu kulturikkut naleqartitat kiisalu ileqqut pingaartinneqarput.

Kulturi eqqarsaatigalugu qassinik ukioqarnissamut killigititat, soorlu aamma qassinik ukioqarnissamut killigititassatut siunnersuutigineqartutut allaqqasut, attatiinnarneqassanersut immikkut isiginiarneqarnissaat ataatsimiititaliamit pingaartinneqarpoq. Siunnersuummi qassinik ukioqarnissamut killigititassatut siunnersuutigineqartut ataatsimiititaliamit taparserneqarput.

Aallaaniarneq piniarnerlu eqqarsaatigalugit kulturikkut oqaluttuarisaanermilu naleqartitat attatiinnarnissaat nukittorsarneqarnissaallu pingaaruteqartutut ataatsimiititaliamit isigineqarpoq. Assersuutigalugu imatut oqaatigineqarsinnaavoq, piniagassamik takunneqqaartoq pisap qanoq agguarneqarnissaanik aalajangiisussatut ileqqorisaaq attatiinnarneqassasoq.

Inatsisissatut siunnersuutip aappassaaneerneqarneranut atatillugu perngartitsilluni ileqqutoqqap piniagassanut pisassiissutitalinnik pisassiissutitaqanngitsunillu atorneqartalernissaanut periarfissaalernissaa pillugu siunnersuummik Naalakkersuisut saqqummiissamaartut Naalakkersuisup akissuteqaammuni ulloq 16. marts 2023-meersumi paasissutissiissutigigaa ataatsimiititaliamit aamma paasineqarpoq.

Inersimasooq piniarnermut allagartaqarpat perngartitsinnermi qassinik ukioqarnissamik killiliissanngitsut inatsimmi allaqqanissaa ***Ataatsimiititaliap Naalakkersuisunut kaammattuutigaat.*** Tassanngaanniit aamma ataatsimiititaliap kissaatigaa inersimasooq akuersissummik pilik pisaqarnissamut akisussaasuusoq, tassuunakkullu kulturikkut perngartitsisarnermik attasititsisoq aamma taamaalilluni inatsimmik unioqutitsinngitsooq.

### **7.3. Najugaqavissuunissamut piunasaqaat (§§ 7, 10 aamma 14)**

Piniarnermut allagartaqarniaraanni Kalaallit Nunaanni najugaqavissuunissamut aalajangersakkanik siunnersuut imaqaarpoq:

- Inuussutissarsiutigalugu piniarnermut allagartami (§ 7, imm. 1 nr. 2), **qaammattini 24-ni** Kalaallit Nunaanni najugaqareersimanissamik piunasaqaateqarpoq taamaattorli

takuuk § 10, imm. 1 nr. 1. (Kalaallit Nunaata avataanut ilinniariarneq assigisaaluunniit pillugit ilaatinneqanngittussat pillugit aalajangersagaq.)

- Piniagassanut pisassiissutaasartunut sunngiffimmi piniarnermut aallaaniarnermillu akuersissutinut (§ 14, imm. 1) **ukiuni kingullerni marlunni ataannartumik** najugaqareersimanissamik imaluunniit (§14, imm. 2, nr. 2) najugaqavissuunissamik aammalu ukiuni qulini kingullerni Kalaallit Nunaanni piffissami ataannartumi minnerpaamik ukiuni marlunni najugaqareersimanissamik piumasaqaateqarpoq.

Najugaqavissuunissamik piumasaqaatip ukiut marlunniit ukiunut pingasunut tallimanulluunniit qaffanneqarnissaa siullermeerinninnermi siunnersuutigineqarpoq, kiisalu piffissap taassuma iluani akileraartartuusimanissaq, ima paasillugu qinnuteqalernermi ukiuni pingasuni tallimaniluunniit najugaqareersimasuunissaq. Najugaqareersimanissamik piumasaqaatissatut siunnersuutininik suliaqarnerminut atatillugu maani najugaqavissut avataaneersullu piniarnermut allagartamik tunineqartartut amerlassusii pillugit Naalakkersuisunut apeqqutinik ataatsimiititaliaq suliaqassalluni aalajangerpoq (tassani Naalakkersuisut akissuteqaataat 16. marts 2023-meersoq innersuussutigineqarpoq, ilanngussa 5)

Tassunga ilanngullugu ukiut amerlineqarnissaannut periarfissamut tunngatillugu Naalakkersuisut akissutaat eqqarsaatigalugu Europami Suliniaqatigiiffimmi Inuit Pisinnaatitaaffii pillugit isumaqatigiissutaannut (takuuk ilanngussa 2) naapertuutinnitsoorsinnaasoq ataatsimiititaliamit maluginiarneqarpoq. Ajornartorsiut taanna pillugu nassuiaasoqarnissaa ataatsimiititaliamit pingaartinneqarpoq kissaatigineqarlunilu tamanna pillugu Naalakkersuisut isummissasut.

#### **7.4. §2-mi, imm. 1, nr.2, allaqqasortaani allannguinnissamik kissaateqarneq.**

Piniartut atuisullu ilisimasaat biologillu ilisimasaat naligiinneqassasut siullermeerinninnermi kissaatigineqarpoq, aammalu oqaaseq atorneqartoq ”naapertuuttumik” peerlugu ”naligiissumik” atorneqalissasoq. Danskisut allaqqasortaani oqaaseq atorneqartoq allannguutaanaviannilaq.

#### **7.5. Piniarnermit aallaaniarnermillu isertitat tamakkerlugit**

50%-imik isertitanik killiliisimanermi §8 malillugu qatserisartut ilanngunneqarsimangitsut ilanngunneqarnissaa *Ataatsimiititaliap Naalakkersuisunut kaammattutigaat*. Tassa imatut oqaatigalugu qatserisartut isertitat aalisarnermi, piniarnermi aallaaniarnermilu isertitanut ilanngutissanngitsut, tassuunakkut piniarnermut allagartamik annaasaqannginniassammata.

#### **7.6. Akiliisitsilluni piniariartitsisartutut akuersissuteqalernissamut piumasaqaatit sakkortunerusut (§ 18)**

Akiliisitsilluni piniariartitsisartutut akuersissuteqalernissamut piumasaqaatit sakkortunerulersinniarlugit malittarisassanik suliaqartoqarnissaa siullermeerinninnermi siunnersuutigineqarpoq. Nunatsinni najugaqavissuunissaq tamaanilu akileraartartuunissaq kissaatigineqartoq oqaatigineqarpoq. Tassunga atatillugu akiliisitsilluni piniariartitsisartutut

ingerlasut akuerisat tamarmik Kalaallit Nunaanni najugaqavissuusut Naalackersuisunit paasissutissiissutigineqarpoq (tassani Naalackersuisut akissuteqaataat 16. marts 2023-meersoq innersuussutigineqarpoq, ilanngussaq 5).

### **7.7. Pisanik tuniniaanissamut atatillugu kommunimi nalunaarsuinissaq pillugu malittarisassanik tulluarsaaneq (§ 23)**

Allaffiit matoqqanerisa nalaanni piniartut pisaminnik kommuninut nalunaarsuititsisarnissaat ajornartorsiutaasinnaasoq siullermeerinninnermi eqqaaneqarpoq, piniartullu pisaminnik tuniniaanissaannut pisariaqanngitsumik kinguarsaataasassasoq.

Nalunaarutit atuuttut malillugit pisanik nalunaarsuineq tuniniaarnerlu allaffiit matoqqagaluarpataluunniit pisinnaavoq, allaffiit ammarniariartut nalunaarutiginninnerit erngerluni pisarpata (tassani Naalackersuisut akissuteqaataat 26. april 2022-meersoq innersuussutigineqarpoq, ilanngussaq 2).

### **7.8. Piniagassanut uumasunut angallatit nunakkoortillunniit motorillit minnerpaamik 500 meterinik ungasissuseqarfigineqassapput (§ 26)**

Inatsimmut siunnersuummi § 26-mi allaqqavoq, angallatit nunakkoortillunniit motorillit piniarnermi piniarfissanukarnermiluunniit uumasut 500 meterinik qaninnerusumi atorneqaqqusaanngitsut. Allaqqavortaaq piniagassanut pisassiissuteqarfiusunut aalajangersimasunut immikkut ittumik pisoqartillugu ungasissusissamik piumasaqaatit allaasinnaasut.

Aalajangersakkanut oqaaseqaatigineqartuni ima allaqqavoq sikukkut ammalatami (sassani) arfernut pisanut tamanna atuutinngitsaq.

Minnerpaamik ungasissusissaq pillugu ataatsimiititaliaq sulinermini Naalackersuisunut assigiinngitsunik apeqquteqarpoq. Ataatsimiititaliamit angallatit nunakkoortilluni motoorillit 500 meterinik minnerpaamik ungasissuseqarnissaq pillugu sukumiisumik eqqartorneqarpoq aamma tassunga atatillugu Naalackersuisunut kaammattuuteqarput.

Qamuteralaat ATV-iit assigisaallu atorlugit assartuussinermut tunngatillugu ungasissusiliinerup peerneqarnissaa *Ataatsimiititaliamit Naalackersuisunut kaammattuuteqarput*. Taamaalilluni qamuteralaat ATV-iillu piniutitut atorneqarnissaannut inerteqqutip atuutiinnarnissaa Ataatsimiititaliap naatsorsuutigaa.

### **7.9. Ukiukkut qimussit atorlugit umimmanniarneq tuttunniarnerlu**

Qimusserluni ukiukkut umimmanniarneqarnissaq tuttunniarneqarnissamullu akuersissutinik tunniussinissamut periarfissat inatsimmut siunnersuutip siullermeerneqarnerani eqqaaneqarput. Tassunga atatillugu Naalackersuisut akissuteqaataat 16. marts 2023-meersoq

innersuussutigineqarpoq, tassani Naalakkersuisunit ilisimatitsissutigineqarluni qimminik qimuttoqarfinni qimussit atorineqarsinnaajuaannartussaasut.

#### **7.10. Qimusserluni qajartorlunilu piniarnissamut kulturikkut pisassiissutit**

Qimussimik qaannamillu piniarnermi immikkut ittunik “kulturikkut pisassiissutinik” pilersitsisoqassasoq siullermeerneqarnerani siunnersuutigineqarpoq. Kulturikkut pisassiissutit inatsimmut ilanngunneqarnissaat annertuumik kissaatigineqartoq ataatsimiititaliamit maluginiarneqarpoq tamannalu tunngavigalugu kulturikkut pisassiissutinik qimussimik qaannamillu pisassanik *Naalakkersuisunut kaammattuutigineqarpoq*.

#### **7.11. Ingerlatsiviit, allaffissorneq nunallu immikkoortuini nakkutilliinissamut periarfissat**

Nunap immikkoortuini nakkutilliinissamut periarfissanik nukittorsaanissap pisariaqartinneqarnera inatsimmut siunnersuutip siullermeerneqarnerani eqqaaneqarpoq. Pisariaqartinneqartut taakkua ataatsimiititaliap siunnersuummik suliaqarnerani eqqartorneqarnikuupput. Tassunga atatillugu ingammik kapitali 7 ataatsimiititaliamit maluginiarneqarpoq.

Piniarnermut nakkutilliisoqarnerup ineriartortinneqarnerata nukittorsarneqarnissaa *Ataatsimiititaliamit Naalakkersuisunut kaammattuutigineqarpoq*, taamaalilluni sinerissami nakkutilliineq nukittorsarneqassamat. Nunatsinni sineriassuup isorartunera inatsillu nutaaq eqqarsaatigalugit inatsit sinerissami assigiinngitsuni pissutsinut naleqqussarneqartariaqarpoq.

Ataatsimiititaliaq isumaqarpoq kommunit akisussaaffimmik annertunerusumik tunineqartariaqartut innuttaasunut qaninnerpaatut sullissisuunerat peqqutigalugu.

Ataatsimiititaliamittaaq § 27 eqqartorneqarpoq, taanna piniarnermut aallaaniarnermullu tunngatillugu ingerlatsivinnut allaffissornermullu tunngassuteqarluni. Piniarneq aallaaniarnerlu pillugit ileqqoreqqusat ilaatigut malinneqarnissaannut kommunit piareersimanissaat qulakkeerneqassasoq *ataatsimiititaliamit Naalakkersuisunut kaammattuutigineqarpoq*.

#### **7.12. Pineqaatissiissutit**

Inatsimmut siunnersuutip siullermeerneqarnerani siunnersuummi pineqaatissiissutit eqqartorneqarput, tassunga ilanngullugu pisap ilaanik qimatsiinnarneq pillugu pineqaatissiineq.

Inatsisissatut siunnersuut (§§ 40-47) naapertorlugu inatsimmi aalajangersakkanik unioqquitsinermi pineqaatissiissutaasinnaasut ukuupput:

- akiligassiinerit,
- akuersissummik atuinissamut pisinnaatitaaffinnik killilersuuganeq,
- akuersissummik arsaarinnineq,
- piniarnermut allagartaqarsinnaanermut pisinnaatitaaffimmik arsaagaaneq,
- angallammik, qamutininik motoorilinnik, atortunik pisanillu arsaarinnikkallarneq,
- umiarsuarnik nunani allaneersunik tigumminnikallarneq,
- arsaarinnineq.

Inatsimmut siunnersuummi § 40-mi, imm. 1, nr. 1, allassimavoq pisap ilaanik qimatsiinnerneq pillugu akiligassiisoqarsinnaasoq (§ 26, imm. 6). Pissutsit tamakku ataatsimiititaliamit eqqartorneqarput, Naalakkersuisunullu itisiliillutik apeqquteqarlutik. Tassunga atatillugu Naalakkersuisut akissuteqaataat 26. april 2022-meersoq innersuussutigineqarpoq, ilanngussa 2.

Pisat isumagereernerisa kingorna torersaasoqarsimanngikkaangat akiligassiisoqartarnerusariaqartoq ataatsimiititaliamit kissaatigineqarpoq.

### **7.13. CVR/GER normut atornagit cpr.normut piniartunit atorneqartarneri**

CVR imaluunniit GER atornagit cpr.normutik piniartut ilaasa inuussutissarsiornermi atortaraat inatsimmut siunnersuutip siullermeerneqarnerani eqqaaneqarpoq. Tassunga atatillugu pissutsit tamakku pillugit Naalakkersuisunut ataatsimiititaliaq apeqquteqarpoq. Tamanna pillugu Kalaallit Nunaanni inuussutissarsiornikkut suliffeqarfiit tamarmik CVR atorlugu nalunaarsuiffimmut nalunaarsorneqartarnissaat inatsisitigut piumasaqaataasoq Naalakkersuisut ilisimatitsissutigaa. Tamatuma saniatigut CPR-normut inuinnarnut atorneqartartut aammalu CVR-normut suliffeqarfimmut atorneqartartut immikkoortinneqassapput.

### **7.14. Oqaaseqaatit allat – aallaasit**

Aallaasit pillugit nalunaarusiami aallaasinut toqqorsivinnut tunngatillugu sukaterinissamut danskinut oqartussanut saaffiginnissuteqarnissaq *ataatsimiititaliap Naalakkersuisunut kaammattuutigaat.*

### **8. Siunnersuutip aningaasatigut kingunerisassai**

Siunnersuutip piviusunngortinneqarnerani aningaasatigut kingunerisassai siunnersuutip nalinginnaasumik oqaaseqaatitaani nassuarneqarput. Tassani allaqqavoq siunnersuummi immikkoortuni marlunni aalajangersakkanik marlunnik imaqartoq pisortani aningaasaqarnikkut allaffissornikkullu kinguneqaratarsinnaasoq, tassa § 19 allaaniarsinnaanermut misilitsinnerup ingerlannissaa pillugu aammalu § 24, imm. 5 pikkorissarsimanissap piumasaqaatiginissaata eqqunneqarnissaa pillugu. Taakkua marluk eqqarsaatigalugit aningaasaqarnikkut allaffissornikkullu kingunerisinnaasaanut Naalakkersuisup periuseq sorleq toqqassaneraa apeqqutaavoq. Periutsimik toqqaasoqanngippat kingunerisinnaasaasa annertussusii eqqoriarneqarsinnaanngitsut Naalakkersuisoq oqarpoq. Ataatsimut isigalugu siunnersuut pisortanut toqqaannartumik allaffissornikkut aningaasaqarnikkulluunniit kingunissaqanngitsaq Naalakkersuisut nalilerpaat.

Tamatuma kingorna piniariarnissamut misilitsittalernissap pilersinneqarnissaa pillugu aalajangersakkap aappassaaneerinninnissamut peerneqarnissaa eqqarsaasersuutigineqartoq Naalakkersuisut ilisimatitsissutigini kuuat, piniariarnissamut misilitsittarnissap aningaasatigut, sulisussatigut, allaffissornikkut ataavartitsinissamulluunniit isumalluutissanik peqartoqannginnera peqqutaalluni.



**Ataatsimiititaliami** toqqammaviit allaqqasut malillugit allatut naliliisoqarnissaanik pissutissaqartinneqanngilaq.

## 9. Ataatsimiititaliap inassuteqaatai

Kaammattuutit ataatsimiititaliamit saqqummiunneqartut naapertorlugit, tassunga ilanngullugu **ataatsimiititaliami amerlanerussutillit** ukuusut Inuit Ataqatigiit, Siumut Demokraatillu siunnersuutip akuersissutigineqarnissaa innersuussutigaat.

Naleraq **ataatsimiititaliami ikinnerussuteqarluni innissisimasoq** ima siunnersuummut oqaaseqaatissaqarpoq:

*“Piniarnermut aallaaniarnermullu inatsimmi pingaarnertut siunertaagaluarpoq Kalaallit Nunaanni piniarneq aallaaniarnerlu pillugit Inatsisartut inatsisaannik paasiuminartumik, ullutsinnut nalequttumik atoruminartumillu pilersitsinissaq.*

*Taamatullu nunatta piniagassatigut pisuussutaanik nalequttumik nungusaataannigsumillu atuinermik aallaaveqartumik kiisalu aningaasaqarniarneq suliffissaqartitsiniarnerlu mianeralugit Kalaallit Nunaanni inuiaqatigiit malittarisassanik peqarluta Naalakkersuinikkut siunnersuut aqutigalugu siunertaqartumik aqqissuussisussaagaluaratta nunap inui aallaavigalugit politikikkut nammineq isummersornitsigut susassaqartullu peqatigalugit aqqissuussinikkut.*

*Aammattaaq Kalaallit Nunaanni Aalisarnermik Nakkutilliisoqarfik sakkussaannik nutaanik arlalinnik nakkutilliisutut oqartussaannerminni ajornannginnerulersitsisinnaasunik atortulersorneqarnissaat siunertaagaluarpoq, taamaalillutik inuit ingerlatseqatigiiffillu piniarnermik aallaaniarnermillu malittarisassanik unioqqutitsisunik ajornannginnerusumik nakkutigineqarlutik ingerlalernissaat inatsisitigut suliatiigullu toqqammavissittussaagaluarpat unioqqutitsisunik pineqaatissisinnaasarniassammata, kisiannili ajoraluartumik tamanna aaqqiiffiginagu Naalakkersuisut aaqqiiumaarnernik imaluunniit atorfinittat soqutigissappassuk siunnersuuteqarsinnaanngorlugit akisussaaffik aningaasalernagu aaqqiiffiginagulu Naalakkersuisunut suliassanngorlugu Partiit sularinagu miloriussiinnarnermut Naleqqamiit uggorilluinnarparput, nalunngilarpummi sumiiffippassuarni nakkutilliisoqarnikkut aqqissuussinikuunataluunniit kusanaqisumik inatsisiliorpugut aaqqiissutissartaalu peqataatinneqannginnera Naleqqamiit ippigilluinnaratigu, tassalu partiit akisussaassuseqartumik suliaq naammassinatigu Naalakkersuisunut miloriutiinnarparput, tamannalu Naleqqamiit uggoreqaarput.*

*Naalakkersuisut anguniagaat kusanaraluaqaaq pingaartillugu oqaatigigaluarmassuk piniarnermik aallaaniarnermillu nakkutilliisut pitsaasumik nakkutilliisinnaatikkumallugit nakkutilliinissamut sakkussanik nutaanik peqalernissaat anguniarlugu inatsit imaqarneraraluarmissuk, kisiannili sulisunik nakkutilliisinnaasunik peqanngikkutta sumut iluaqutaassagamik anguniakkat allartorsimasut kusanqisut sulisoqarnikkut nakkutilliisussanik sulisulersorneri ilanngunneqanngippata. Tamanna anguniakkanik kusassaanerinnartut isigaarput tamakkiisumillu aaqqiigani pisarnertut Naalakkersuisunut akisussaaffimmik*

*aningaasartalersorneqanngitsumillu Naalakkersuisunut miloriusinerinnartut Naleqqamiit isigalutigu sakkortuumik uparuaatigaarput.*

*Piniarneq aallaaniarnerlu inuiaqatigiinnut Kalaallit Nunaanni sineriammi isorartoqisumi pingaaruteqartorujussuartut inissimavoq tamaammat Aalisarner Piniarnermullu Naalakkersuisumut nalilersugassat innersuussutigineqartorpassuit imarisai assigiinngitsut annertunerusumik aaliangiiffinagit aammalu atuisunut sunniuteqangaarsinnaasut takusinnaasagut naammassillugit suliarinagit Naalakkersuisumut miloriutiinnarneqartut assut Naleqqamiit uggoraagut qinikkat suliassatik Naalakkersuisunut suliakkiisutigiiarlugit ingerlateqqiinnarmatigit assut Naleqqamiit ippigaarput.*

*Piniarneq assigiinngitsorpassuartigit inuiaat kalaallit ingerlataqarfigaat aammalu kulturikkut annertuumik pingaaruteqarluinnartut ilagiinnarnagu inuusaattitsinnut ilaalluinnarpoq, amerlasuummi suli pinngitsoorsinnaanagu inuusaaseraat, taamaamallu nunatsinnut aammalu nunap inuisa inuusaasaannut naleqquttumik aaqqissuussiffiginissaa aatsaat taama pingaaruteqartigaluartoq Naalakkersuisunut aaliangiiffigisassanngorlugit miliorussorneqaannarmata aaliangiiffiginagit assorujussuaq Naleqqamiit eqqarsarnartoqartipparput, ataasiakkarlugit isummersuutit annguttagut ilamerngi itisilerniarneqarluarlutik annertunerusumik isummersorfigineqaratik Naalakkersuisut aaliangiiffigisagaat innersuunneqaannartaarneri uggornartutut Naleqqamiit nalilerparput.*

*Naalakkersuisut siunnersuummi saqqummiussamut ilanngullugu oqaatigaa piniagassat nungusaataanngitsumik tunngaveqarluni atorneqarnissaasa qulakkeernissaat siunnersuummi matumani Naalakkersuisut ilanngullugu siunertarigaat.*

*Tamatumunnga tunngatillugu Naleqqamiit oqaatigiuagarput oqaatigeqqissavarput, aap ukiorpassuarni kinguariit manna nuna najorsimavaat, uumasunik nungutitsinngisaannaarlutik avataaniilli aammalu atortorissaarutit siuariartornerat ilutigalugu naleqqussaasoqartarnera ilaatigit avaqqukkuminaassinnaasartoq, taamaakkaluartorli aammaarluta erseqqissaqqissavarput uagut nammineq aallaavigaluta aammalu nunnap inui aallaavigalugit aaqqissuussisarnerput annertunerusumik ingerlatilertariaqaratsigu.*

*Taamattumik Naalakkersuisuniit ingasattajaartumik killilersuinerujussuup ilaatigit kingunerileraa takunngitsuusaarneqartut ilagaat uumasut imminnut nerisaqatigiinnerat innarlarerujussuartaarneqalernerat uumasut ilaat illersorniaraluarlugit, tamakku tamaasa assigiinngitsutigut toqqammavilersortarnikuugatsigit ataatsimiititaliami ilanngullugit sukumiisumik suliaqarnissaat kissaatigisiamgaluarparput nalilersorluarlugit inatsimmi ilagilluinnartariaqaraat naleqqussaaneq Naleqqamiit isumaqarfigaluaratigu, tamannalu annertunerusumik qiviarneqarani Naalakkersuisut piumasaminnik aaliangersaqqissagaat akisussaaffik tamaat Naalakkersuisunut miloriutiinnarneqarnera Naleqqamiit uggoraarput.*

*Piniarneq aallaaniarnerlu pillugit Inatsisartut inatsisaattut siunnersuut maanna Naleqqamiit annertuumik peqataaffigereerlugu killiffia aaliangersagassallu imaannaanngitsut amerlasuut qanoq aliangersaaffigineqassanersut qulaajarnagit Naalakkersuisunut aaliangersagassannogorlugit miloriutiinnarneqarnerat Naleqqamiit assut eqqarsarnartoqartillugit ikinnerususseqarluta suliap ingerlanera naammaginatigu taamatut oqaaseqaaateqarpugut.”*

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Hans Aronsen  
Siulittaasoq

---

Jens Napãtøk´  
Siulittaasup tullia

---

Agathe Fontain

---

Adam Kristensen

---

Jens Kristian Therkelsen

---

Lars Poulsen

---

Jens-Frederik Nielsen



Aalisarnermut Piniarnermullu Naalakkersuisoq  
[apn@nanaoq.gl](mailto:apn@nanaoq.gl)

Dato: 26-04-2022  
J.nr.: 01.36.01.03-00112

## Ulloq 29. april 2022 nal. 13-14 ataatsimiittarfik Erling Høeghimi aalisarnermut piniarnermullu inatsit pillugu ilisimatitsinissamut aggequsissut

Oqaluuserisassaq 170 piniarnek aallaaniarnerlu pillugit/ inatsisissatut siunnersuut pillugu Aalisarnermut Piniarnermullu Naalakkersuisumik ilisimatitsinissamik ataatsimeeqateqartoqanissaa Aalisarnermut-, Piniarnermut- Nunalerinermullu Ataatsimiititaliap 25. april 2022 ataatsimiinnermini aalajangerpaa.

Ilisimatitsinissamut ataatsimiinnissaq pissaaq tallimangorneq 29. april 2022 ataatsimiittarfimmi Erling Høeghimi

Oqaluuserisassat tullinguuttut Ataatsimiititaliap oqaluuseriniarpai itisilertikkusullugillu / §§:

- Sunngiffimmi piniarsinnaasut ukiutigut killigitaq 15-nik ukiulinnut tuttunniartunut apparniarneqarpoq (§ 14, stk. 1)
- Akunnerup naanerini nalliuttunilu kalaalimineerniarfinni nalunaarsuinerit malitsigisaanillu tuniniaarnerit ajornartorsiutitaqarneri, kommunit allaffiisa matoqqanerini (§ 23)
- Najugaqartussaananermik piumasaqaat akileraartussaananermillu pisussaaffeqarnek (§§ 7,10 aamma 14) – inuussutissarsiutigalugu piniartunngorsinnaananermut aamma sunngiffimmi piniarsinnaananermik allagartaqarnermut aallaaniarnermullu najugaqareernissamik piumasaqaataasup sivitsornissaa ukiut 3-ni imaluunniit ukiuni 5-ni.
- Arfanniarnek pillugu aqutsisoqarfinni inuit allattorsimaffianni najugaqarnissaq (12, imm. 2)
- Pisanik arsaarinnineq – qaqugukkut pisinnaaneranik itisiliineq.
- Kommuunimi aqutsineq ingerlatsinerlu (§ 27)

Ataatsimiinnerup nalaani inatsisissatut siunnersuut pillugu ilassutaasunik apequteqartoqarsinnaanera ataatsimiititaliap naatsorsuutigaa.

Inussiarnersumik inuulluaqqusillunga



Hans Aronsen

Aalisarnermut-, Piniarnermut- Nunalerinermullu Ataatsimiititaliap siulittaasua



Inatsisartut Aalisarnermut, Piniarnermut Nunalerinermullu Ataatsimiititaliaa,

Siulittaasoq Hans Aronsen  
Maani/Her

lekn@ina.alla.gl

## **Piniarneq aallaaniarnerlu pillugit Inatsisartut inatsisaat pillugu apeqqutinut akissut**

Oqaluuserisassaaq imm. 170 piniarneq aallaaniarnerlu pillugit - inatsisissatut siunnersuut pillugu Aalisarnermut Piniarnermullu Naalakkersuisumik ilisimatitsinissamik ataatsimeeqateqartoqarnissaa Aalisarnermut-, Piniarnermut- Nunalerinermullu Ataatsimiititaliap apriliip 25-anni 2022 ataatsimiinnermini aalajangersimavaa.

Ilisimatitsinissamut ataatsimiinnissaaq pissaaq tallimangorneq 29. april 2022 ataatsimiittarfimmi Erling Høeghimi.

Oqaluuserisassat tullinguuttut Ataatsimiititaliap oqaluuseriniarpai itisilertikkusullugillu, tulleriinneri malillugit akissuteqarfigineqarput:

- 1) Sunngiffimmi piniarsinnaasut ukiutigut killigitaq 15-nik ukiulinnut tuttunniartunut apparniarneqarpoq (§ 14, stk. 1)
- 2) Sapaatit akunnerisa naanerini nalliuttunilu kalaalimeerniarfinni nalunaarsuinerit malitsigisaanillu tuniniaarnerit ajornartorsiutitaqarneri, kommunit allaffiisa matoqqanerini (§ 23)
- 3) Najugaqartussaarnermik piumasaqaat akileraartussaarnermillu pisussaaffeqarneq (§§ 7,10 aamma 14) – inuussutissarsiutigalugu piniartunngorsinnaanermut aamma sunngiffimmi piniarsinnaanermik allagartaqarnermut aallaaniarnermullu najugaqareernissamik piumasaqaataasup sivitsornissaa ukiuni 3-ni imaluunniit ukiuni 5-ni.
- 4) Arfanniarneq pillugu aqutsisoqarfinni inuit allattorsimaffianni najugaqarnissaaq (12, imm. 2)
- 5) Pisanik arsaarinninneq – qaqugukkut pisinnaaneranik itisillineq.
- 6) Kommuunimi aqutsineq ingerlatsinerlu (§ 27)
- 7) Ataatsimiinnerup nalaani inatsisissatut siunnersuut pillugu ilassutaasunik apeqquteqartoqarsinnaanera ataatsimiititaliap naatsorsuutigaa.

Pillugu 1) Siunnersuutaasimasup imarisaasa pingaarnert ilaatigut ilagivaat aallaaniar-nissamut allagartaqarnissamut 16-ileereersimanissamik piumasaqaateqarnissaaq – tama-tigut. Siunnersuummi inuussutissarsiutigalugu piniarsinnaanermut allagartaqarnissamut sunngiffimmilu piniarsinnaanermut allagartaqarnissamut piumasaqaatit immikkoortinne-qarsimapput. Taakkununnga marlunnut 16-ileereersimanissaaq piumasaqaataasimaga-luarpoq. Taamatut allannguuteqarnermi piniarneq aallaaniarnerlu pillugit inatsit sakkut pillugit inatsisissatut siunnersuummut naapertuutsinniarneqarsimavoq.

Tassunga ilanngullugu 16-inik ukioqalereersimanissamut piumasaqaat tuttunniarnermi umimmanniarnermilu akuersissuteqarnissamut piumasaqaammut 2013-imi atuutiler-sumut naleqqussarneqarpoq. Taamatut piumasaqaateqarneq uumasunut piniakkanut killilersukkanut tamanut atuutsinniarneqarpoq. Piniakkanut killilersukkanut 15-ileereersimanissaaq 2019-imi ukiakkut taamanikkut Naalakkersuisuusunit aalajangiunneqarpoq -

Dato: 26-04-2022  
Sags nr.: 2021 - 21554  
Akt. nr.: 19911641

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apn@nanoq.gl  
www.naalakkersuisut.gl

tamatigut 16-ileereersimanissaq pinnagu, kalaallit aallaaniarnikkut piniarnikkullu kulturiat tunngavigalugu.

Pillugu 2) Nalunaarutini atuuttuni erseqqissarneqarpoq pisanik nalunaarsuineq, taamatullu tunisineq, soorlu kalaalimeerniarfinni, kommunit allaffiisa matoqqanerini sap.ak.-isa naanerini nalliuttunilu pisinnaasut, kommunit allaffiisa ammarnerini piaartumik nalunaarsuineq ingerlanneqassappat. Tamanna assersuutigalugu arfernik angisuunik, aavernik, qilalukkanik qaqortanik qernertanillu illersuineq piniarnerlu pillugit nalunaarutini atornerqarpoq.

Pillugu 3) Paatsoortoqarsimassaaq, tassami inuussutissarsiuutigalugu aallaaniarsinnaanermut allagartaqarnissamut ukiut pingasut imaluunniit tallimat piunasaqaataaniangillat, taamaallaalli sunngiffimmi aallaaniarsinnaanermut allagartaqarnermut tunngatillugu sukaterinerulluni inunnet Kalaallit Nunaannut noorlaanut.

Assigiinngitsut pissutigalugit inuussutissarsiuutigalugu piniarsinnaanermut imaluunniit sunngiffimmi piniarsinnaanermut allagartamik qinnuteqannginnermi ukiuni kingullerni marlunni ataannartumik Kalaallit Nunaanni najugaqarsimanissamik piunasaqaat Naalakkersuisut attatiinnarpaat, piniakkat killilersukkat eqqarsaatigalugit. Tassunga pissutaasoq pingaarnepaaq tassaavoq nunatsinnut nooqqammersut nunaqavissutulli allatut akileraartartueneri. Piniakkanut killilersukkanut, soorlu tuttunniarnissamut umimmanniarnissamullu akuersissutinik qinnuteqartoqartillugu, ulloq qinnuteqarfiusoq sioqqullugu ukiuni kingullerni qulini sivikinnerpaamik ukiuni marlunni ataannartumik nunatsinni najugaqarsimasuunissamik piunasaqaataavoq. Tamanna sunngiffimmi pinialuttartunut taamaallaat atuuppoq. Aammattaaq inuiaassuseq tunngavigineqanngilaq, tassa imaappoq inuiaassuseq tunngavigalugu assigiinngisitsisoqanngilaq. Taama ililluni Europami Inuit Pisinnaatitaaffii pillugit Isumaqatigiissummi immikkoortoq 14 malinneqarpoq, inuiaassuseq pillugu assigiinngisitsinermut assersuut eqqarsaatigalugu.

Sunngiffimmi piniarsinnaanermut allagartaqarnissamut ukiunik pingasunik imaluunniit tallimanik qaavatigut sukaterineq allannguutaassaaq annertoq kiisalu Inuit Pisinnaatitaaffiinut Isumaqatigiissummut naapertuunnani.

Pillugu 4) Nunat Tamalaat Akornanni Arfanniarnermut Ataatsimiititaliarsuup Kalaallit Nunaata kitaani tunumilu arfattassat aalajangertarpei. Assersuutigalugu Kalaallit Nunaata kitaani tikaagulleqatigiit ataatsitut isigineqarput. Taamaattumik assersuutigalugu angallat qamutilimmik tuukkartalimmik pilik Nuummeersoq, tikaagullinniarnissamut akuersissummik peqartoq, Maniitsumut imaluunniit Sisimiunut imaluunniit Kalaallit Nunaata kitaata sinneranut tikaagullinniarsinnaavoq, taamaattorli kommunerisamini pisani nalunaarutigissavaa. Angallat akuerineqarsimasoq kommunimini akuersissummik peqanngipat, taava piginnittoq kommunimut allamut akuersissummik qinnuteqarsinnaavoq, tikaagullinniarnerniut atatillugu qaninnerusumut. Pisanili kommunerisamini nalunaarutigissavai. Periarfissaq tamanna atornerqartarpoq eqaatsumik periuseqarnissaq kissaatigineqarmat. Tikaagullinnut, qipoqqarnut, tikaagulliusaanut arfivinnullu pisassat sinneqarajupput, pingaartumik angallatinut qamutilissortunut.

Pillugu 5) Arsaarinnittoqarnerusarpoq piniakkanik killilersukkanik akuersissuteqarani pisaqartoqarsimatillugu, imaluunniit piffissap piniarfigeqqusaasup avataatigut pisaqartoqarsimatillugu imaluunniit uumasoaqatigiinnit allanit pisaqartoqarsimatillugu. Tassa imaappoq malittarisassat atuuttut ersarissumik unioqqutinneqarsimatillugit. Piniakkat killilersukkat tamarmik akuersissuteqaqqaarluni imaluunniit allassimasumik akuersis-



summik peqartoqartillugu pisarineqarsinnaapput, tassanilu takuneqarsinnaallutik assersuutigalugu nannunniarnissamut qilalukkanilluunniit qernertarniarnissamut piumasaqaatinik naammassinnissinnaaneq. Arsaarinnittoqartarpoq uppersarsarneqarsinnaasumik piniarnermi piumasaqaatinik unioqqutitsisoqarsimatillugu, politiillu arsaarinnittuusarput. Assersuutigalugu unioqqutitsilluni nannuttoqarsimatillugu arsaarinnittoqarnerani neqaa nunaqqatigiinnut agguanneqartarpoq. Amia, kukii niaqualu kigutitalik arsaarinnissutigineqartarput Naalakkersuisoqarfimmullu nassiunneqarlutik, tassaniitinneqartarpullu suliap Politiniit naammassineqarnissaata tungaanut. Qaammatit marluusinnaapput ukiut marluk tungaannut, taamaalineranilu suliaq nutaanngilisoorsimasarpoq. Naalakkersuisoqarfiup ammit assersuutigalugu Katersugaasivinnut, Sisimiuni Kalaallisuliornermik Ilinniartarfimmullu nassiuttarpari, kulturitsinnut atatillugu atornerqarsinnaasunngorlugit.

Nannup arnaviap piaraata/-salu amii niaquilu aamma arsaarinnissutigineqarsinnaasarpup, imminut illersorniarluni imaluunniit allatut ajornartumik toqunneqarsimasunit pisuuppat. Nanoq arnaviaq piaraalu eqqissisimatitaalluinnarpoq. Nannup inersimasup neqaa nunaqqatigiinni agguarneqartarpoq. Nannup piaqqap amia neqaalu ikuallanneqartarput. Nannut allat inersimasut imminut illersorniarluni imaluunniit allatut ajornartumik toqunneqarsimasut ilaatigut aamma Tunumi atuarfimmu atuatitsinerme atugassatut nassiunneqarnikuupput, imaluunniit Politinut ilinniartitsinerminni atugassaattut, imaluunniit mittarfinni CITES pillugu paasitsiniaalluni saqqummersitsinerne atatillugu atugassatut.

Malittarisassalli januarip aallaqqaataani 2022 allanngortinneqarput, taamaalillutik nannut imminut illersorniarluni imaluunniit allatut ajornartumik toqunneqarsimasut maanna pisassanut ilanngaatigineqartalerlutik. 2022-mi pisassanut nannut qulit Naalakkersuisunit ilaatinneqarput. Taama pisoqartillugu piniartup inuussutissarsiutigalugu piniarsinnaanermut allagaqartaqartup imminut illersorniarluni/allatut ajornartumik nanoq pisarisani tamaat pisinnaanngorpari. Nannullu arnavissat piaraallu eqqarsaatigalugit tamanna allaaneruvoq, taakkumi eqqissisimatitaalluinnarput. Taamaalisoqartillugu nannup arnavissap inersimasup neqaa nunaqqatigiinni agguarneqassaaq, amia kukiilu kiisalu niaqua kigutai ilanngullugit Naalakkersuisoqarfimmiinneqassapput, piararli tamarmi ikuallanneqassaaq.


Pillugu 6) Nuna tamakkerlugu pisassat pillugit Naalakkersuisut aalajangereeraangata, kommunit ataasiakkaat pisassat illoqarfinnut nunaqarfinnullu agguataartarpari. Taama ilisoqartillugu kommunit namminneerlutik aalajangertarpari pisassat qassit inunnut inuussutissarsiutigalugu piniarsinnaanermut allagartalinnut aamma/imaluunniit sunngiffimmi piniarsinnaanermut allagartalinnut tunniunneqassanersut, tassani pineqarput tutut, umimmaat, qilalukkat qaqqortat qernertallu. Kommuninit akuersissutit qinnuteqarsimasunut tunniunneqartarput.

Assersuutigalugu Qeqqata Kommuniata ukiumi aamma aasami/ukiami umimmattassat agguataartarpari, kiisalu akuersissutit agguataarneqarneri tunniunneqarnerilu isumagisarlugit, ilaatigullu pisassanik sinneruttunik agguasseqqittarlutik. Kommunip nammineq aalajangertarpari pisassanit qassit inunnut qimussimik angallateqartunut aamma/imaluunniit qamuterallannik/ATV-nik angallateqartunut tunniunneqassanersut.

Kommuni ileqqoreqqusaliornermigut erseqqinnerusunik malittarisassiorsinnaavoq assersuutigalugu ukiuunerani umimmanniarnermi qamuterallannik, qimussinik imaluunniit ATV-nik atuinermut tunngatillugu. Qamutit motorimik angallatillit aqqutissaasa sumiinnissaat kommuni nammineq aalajangertarpari.

Kommuni aamma puisinniarnermi imaluunniit qernertanik qilalugarniarnermi qassu-  
sersornissamut tunngasunik ileqqoreqqusaliorsinnaavoq. Ileqqoreqqusaq kommunip  
suliaa Aalisarnermut Piniarnermullu Naalakkersuisumit atortussanngortinneqassaaq.

Inussiarnersumik inuulluaqqusillunga



Karl Tobiassen

Aalisarnermut, Piniarnermullu Naalakkersuisoq





Inatsisartut Aalisarnermut, Piniarnermut Nunalerinermullu Ataatsimiititaliaat  
Siulittaasoq Hans Aronsen

Att. Steen Qourning pr. STQUO@ina.alla.gl

**Allakkatigut akissut, ataatsimoorussilluni piniarneq aammalu Politimester-imit  
tusarniaanermut akissut –Apriliip 29-anni 2022 paasisutissiilluni  
ataatsimiinnermit malinnaatitsineq pillugu**

Dato: 09-05-2022  
Sags nr.: 2021 - 21554  
Akt. nr.: 19950274

Apriliip 29-anni 2022 Aalisarnermut Piniarnermullu Naalakkersuisup aammalu Inatsisartut Aalisarnermut, Piniarnermut Nunalerinermullu ataatsimiititaliaata akornanni paasisutissiilluni ataatsimiinnermi Ataatsimiititaliamit paaserusunneqarpoq, "Piniar-  
tarnerup aaqqissuunneqarneranut" malittarisassat. Ataatsimoorussilluni piniarnermi piniartoq ataasiinnaanngippat, inuussutissarsiuutigalugu aammalu saniatigooralugu piniartunut sanilliutissagaanni qanoq paasisariaqarnersoq. Tassunga ilanngullugu pisanik agguaassinermi malittarisassaqaarnersoq.

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apn@nanoq.gl  
www.naalakkersuisut.gl

**Ataatsimoorussilluni piniarnermut tungasoq:**

Aallarniutigalugu innersuutigineqarpoq § 8a-mi piniaqatigiinneq pillugu inatsisikkut tunngavik; "Piniarneq aallaaniarnerlu pillugit Inatsisartut inatsisaata allanngor-  
tinneqarneranik Inatsisartut inatsisaat nr. 9, 15. april 2003-meersoq (Piniaqatigiinnermik aqutsisussamik toqqaasarneq):

"§ 8a. Piniaqatigiinnermut atatillugu piniaqatigiinnermi aqutsisussamik toqqaanissaannut peqatigiiffiit kattuffiillu Naalakkersuisut piginnaatissinnaavaat.

Imm. 2. Piniaqatigiinnermik aqutsisup piniaqatigiinnermi peqataasutut allatut pinia-  
qatigiinnermut peqataanermut piumasaqaatit qaqugukkulluunniit atuuttut naammass-  
sisimassavai."

Ataatsimoorussilluni piniartoqartillugu kinguliini aalajangersakkat assigiinngitsut tulliuuttuni allaaserineqarput:

**Arferit angisuut:**

Aallartissutigalugu tikaagullinniarneq akuerisaavoq angallatit qamutilillit tamakkerlugu 9,2 aammalu 22 meter-nik tamakkerlugu takissusillit (l.o.a.) akornanni. Angallatit qamutilillit illoqarfanni aammalu nunaqarfanni tamani piunngillat. Taamaalilluni umiatsiaaqqat atorlugit aammalu qoorortoorsorluni, sulloqqortussuseq 30-06 (7,62x63 mm) atorlugu killilimmik tikaagullinniarneq periarfissinneqarpoq. Namminersorlutik Oqartussat Nalunaarutaanni § 13, nr. 9, 6. December 2018-imeersumi, arfernik angisuunik illersuinnermi piniarnermilu umiatsiaararsorluni ataatsimoorussilluni tikaagullinniarnermi piumasaqaatit allaaserineqarput, ilaatigut akuersissut umiatsiaaqqanut ikinnerpaamik tallimanut tunniunneqarsinnaammat, neqissaqarniarneq eqqarsaatigalugu, inoqutigiinnut pingaaruteqartutut nalilerneqarpat. Ataatsimoorussilluni piniarniarneq akuersissutigineqassappat naalunaarummi immikkoortut allat arfineq pingasut naammassisimasariaqarput.

Aamma ataatsimoorussilluni tikaagulliusaamik angallatit marluk 9,2 m-nik tamakkerlugu takissusillit atorlugit piniartoqarsinnaavoq, piffimmi pineqartumi minnerpaamik 11 m

takissuseq tamakkerlugu angallateqarsimangippat, takuuk. § 16. Tikaagulliusaat uumasuupput angisoorsuit aammalu pisariaqarluni uumasooq taamaattoq toqunnniaraanni naleqquttunik sakkoqarnissaq. Arfiviit qipoqqaallu ataatsimoorussilluni qamutilimmik piniarneranni aamma malittarisassat assingusut atorreqarsinnaapput, takuuk. § 19 aammalu § 22.

**Qilalugaq qaqortaq aammalu qernertaq:**

Qilalukkap qaqortap qernertallu piniarnerani oqaasertaliunneqarpoq, "Ataatsimoorluni piniarneq ima paasineqassaaq, piniartunit ataatsimoortunit ukunannga inunnit piniarnermut allagartalinnit piniarneq ingerlanneqartoq", takuuk Namminersorlutik Oqartussat Nalunaarutaani § 2-mi, nr. 3, 27. Januar 2017-imeersumi, qilalukkat qaqortap qernertallu illersorneqarnerannut piniarneqarnerannullu tunngasoq.

§ 8-mi, imm. 1-mi allassimavoq "Nunap immikkoortuani uumasooqatigiinnut pisassiissutinik Naalakkersuisut aalajangersaanerisa iluanni qinnuteqarneq malillugu Kommunalbestyrelsi qinnuteqartunut ataasiakkaanut ataatsimoorlunilu piniarnissamut akuersissutinik tunniussisassaaq."

§ 9, imm. 2-mi allassimavoq "Kommunalbestyrelsi inuussutissarsiutigalugu piniartunut aamma sunngiffimmi piniartartunut ataatsimut piniarnissamut akuersissummik tunniusseqqusaanngilaq."

Taamatuttaarlu imm. 3-mi aammalu 4-mi §-imi pineqartumi: "Kalaallit Nunaata kitaani aqutsiveqarfimmi qilalukkanut qaqortanut qernertanullu pisassiissutit 10 procentii angullugit sunngiffimmi piniarsinnaatitaasunut tunniunneqarsinnaapput.

Imm. 4. Kangiani aqutsiveqarfimmi qilalukkanut qaqortanut qernertanullu pisassiissutit 15 procentii angullugit sunngiffimmi piniarsinnaatitaasunut tunniunneqarsinnaapput."

Tamanna peqquteqarpoq kommuuninit aammalu KNAPK-mit kissaatigineqarmat, inuussutissarsiutigalugu piniartut aammalu sunngiffimmi piniartut avissaartinneqarnissaat, siusinnerusukkut ataatsimoorluni piniaqatigiinnermi, pineqartut akornanni pisanik agguassineq pillugu assortuussutigineqartarsimmata.

§ 10-mi piomasaaqatit allaatigineqarput "ataatsimoorluni piniartoqassatillugu piniarnermut naalakkatut toqqarneqartumut akuersissuteqartoqassaaq. Ataatsimoorluni piniarnermut naalagaq peqataasullu sinnerisa aqqi inuuillu akuersissummut allanneqassapput."

**Nannut:**

Nannunniarnermut atatillugu ataatsimut piniaqatigiinneq aamma periarfissaavoq. § 16 naapertorlugu "Piniaqatigiittoqarsimatillugu pisaq nalunaaruteqartussatut toqqakkamit ataasiinnarmit, assersuutigalugu akuersissummik piginnittumit, nalunaarutigineqassaaq, piniaqataasimasut tamarmik aqqi inuttullu normui nalunaarlugit."

**Aarrit:**

Aavernut tunngatillugu assingusumik aqqissuussaqarpoq, takuuk § 11, imm. 4 Namminersornerullutik Oqartussat nalunaarutaat nr. 20 af 27. Oktober 2006-imeersumi avernik illersuineq piniarnerlu pillugit "Piniaqatigiittoqarsimatillugu pisaq nalunaaruteqartussaatitamit toqqakkamit ataasiinnarmit, assersuutigalugu akuersissummik piginnittumit, nalunaarutigineqassaaq, piniaqataasimasut tamarmik aqqi inuttullu normui nalunaarlugit." Taamaallaat inuussutissarsiutigalugu piniartut aavernik pisaqarsinnaapput. Akuersissutit sinnerlugit piniarnissamik qinnuteqartoqarnerani kommunimit agguataa-

rinissaq aalajangerneqassaaq, takuuk. § 6 (makitsineq, tullerriaarineq imaluunniit assingusumik).

**Ningerneq – pisanik agguagarsineq:**

Kommunini pisanik ningertarnernut imaluunniit agguaanermit tunngatillugu Naalakkersuisut imaluunniit Naalakkersuisoqarfik akuleruttangillat. Annertuumik eqimattani assortuuttoqartillugu kommuni malittarisassaliornissamik nalunaaruteqassaaq. Periarfissaq taanna nannunik illersuineq piniarnerlu pillugit nalunaarusiornermut ilanngunneqalersaarpoq, pingaartumik Tasiilap aqutsiveqarfiani assortuunnerit annertuut pisinnaasarmata, nannumik takunneqqaarnermi ileqqusumut tunngatillugu.

Ittoqortoormiini aammalu Tasiilami aqutsiveqarfinni KNAPP-qarfimmini "Ataqpeqatigiinnissamik lumaqatigiisummik" pilersitsisimapput, 2019-2020-lu missaani ileqqoq pineqartoq atorunnaarsinneqarluni, taamaalilluni nannuttassat taamaallaat inuussutissarsiutigalugu piniarnermut akuersissutillit nannuttassanik tunineqartarlutik. Assortuunneq uteqattaartuarmat nannunik illersuineq piniarnerlu pillugit nalunaarummut missingersuummi kommunit malittarisassiorsinnaanerit siunniunneqarpoq, taamaalilluni kommunimi innuttaasut tamarmik ningernermit assigiimmik pineqarnissaat malittarisassaqaalissaaq.

Tamatuma saniatigut Ataatsimiititaliamit kissaatigineqarpoq piniarnermut aallaaniarnermullu inatsimmut tunngatillugu, politiinit tusarniaanermi allakkiaq akissuteqaataat nassiunneqassasoq, uani ilanngunneqarpoq.

Inussiarnersumik Inuulluaqqusillunga

Karl Tobiassen

Aalisarnermut, Piniarnermullu Naalakkersuisoq



POLITIMESTEREN I GRØNLAND

Imaneq 22 - Postbox 1006 - 3900 Nuuk  
Telefon (+299) 70 14 48-Telefax (+299) 32 41 94

Dato: 4. januar 2021

J.nr.: 55pm-10162-00109-20

SMO

---

Aalisarnermut, Piniarnermut Nunalerinermullu Naalakkersuisoqarfik

(mail-ikkuinnaq uunga nassiunneqassaaq: [APNNcw.nalere@qanooq.gl](mailto:APNNcw.nalere@qanooq.gl))

## **Piniarneq Aalaaniarnerlu pillugit Inatsisartut Inatsisissaattut siunnersuummut Kalaallit Nunaata Politiivinut tusarniaanermi akissut (Nanoq - ID nr.: 15619610)**

Kalaallit Nunaata Politiivisa tusarniaavigineqarnertik qutsatigaat.

§ 39 pillugu

Maluginiarneqarpoq § 39, imm. 2 allanngortinniarneqartoq imatut, taanna, piniarnermut allagartaqarsinnaatitaanermik paaaffigisaasoq, imaluunniit taanna § 15 imaluunniit § 16, imm. 4, naapertorlugu piniarnermut allagartamik arsaagaasoq, piniarnermut allagartamik arsaarinnissutigineqartumik kommunip allaffianut tunniussissasoq, Politiinuunngitsoq. Kalaallit Nunaata Politiivi tamatumani isumaqataapput.

Malugeqquneqarpoq, § 39, imm. 3-p imarisaa Pinerluttaalisitsinermi inatsimmi Piginnaatitaaffimmik annaasaqarnermut tunngasortaani, § 164, imm. 3 kiisalu § 165, imm. 3, naapertuummata Aalajangersagaq pineqartoq uagut paasinnittaaserput naapertorlugu pisariaqanngilaq. Paarlattuanik eqqarsaatigineqarsinnaavoq, Pinerluttaalisitsinermi Inatsit naapertorlugu piginnaatitaaffiigaaneq pigisaqaqqilerlerlu innersuunneqartoq. Ilanngullugu oqaatigineqassaaq, Kalaallit Nunaata eqqartuussiveqarfiini eqqartuussutit nalunaarutigineqarneq ajormata, taamaallaat aalajangiinerit eqqartuussinerillu.

§. 40 pillugu.

Aalajangersakani siunertarineqarpoq malittarisassanik aalajangersaanissaq oqaasertamikkut aammalu isumarisamikkut arsaarinnissuteqarnermi suliap ingerlanerani malittarisassanut naapertuuttumik aammalu ilanngullugu aalajangiisoqareernerata kingorna suliamik naammassinniineq.

§ 40, imm. 1 siunnersuummi imatut oqaasetaqarpoq:

*Tunngavissaqarpat isummissalluni, angallat imaluunniit nunami angallassissut, una Inatsisartut Inatsisaat unioqqutillugu imaluunniit aalajangersakkat inatsimmut attuumassuteqartut unioqqutillugit atorneqarsimasoq, akiliisitsinermik imaluunniit arsaarinnissuteqarnermik kinguneqarsinnaasoq, taava Nakkutilliisussaataitanermik piginnaatitaaffeqartumit tiguneqarsinnaavoq. Nakkutilliisinnaasutut piginnaatitaaffeqartumik*

---



*arsaarinnissuteqarnek atuutinneqalerpat eqqaartuussisoqarnermi sulinermi kapitel 37, arsaarinnissuteqarnermut tunngasoq, naapertorlugu suliaq ingerlanneqassaaq.*

Aalajangersagaq qiviraanni angallammik tigumminnikkallarnermi/arsaarinnissuteqarnermi aalajangersakkami suussuseq aallaavigalugu piumasaqaatitaqannginnera peqqutaalluni, Kalaallit Nunaata Politiivinit paasiuminaatsinneqarpoq, siunnersuummi eqqaartuussiviup suleriaasiani kapitel 37 –mi oqaasertaliussanut innersuussineq nakkutilliisussaataaasumut tigumminnikkallarnermi (arsaarinninnermi) piumasaqaatinik allanik imaqarnermaq, soorlu eqqaartuussiviup sulianik ingerlatsinermi aalajangersakkanut kapitel 37-mi aalajangersarneqarsimasunut naapertuuttut, angallat uppernaasaataasinnaasoq, arsaarinnissutigineqassasoq imaluunniit akiliisitsinissamik assigisaanilluunniit piumasaqartoqarsimappat sillimmatitut inissisimassasoq imaluunniit kapitel 37-p innersuussutigineqarneranut taamaallaat tigumminnikkallarnek (arsaarinnissuteqarnek) kisimi eqqaartuussivimmuut tunniussinissamut eqqarsaataanersoq.

Oqaatigineqassaaq inatsimmi, eqqaartuussiviup aalajangernissaa sioqqullugu suliap qanoq isikkoqarluni tunniunneqarnissaa erssernerlummat, kiap apeqqut assigisaalu tunniutissaneraa. Aalajangersagaq oqaasertai ilanngullugit taamatut isikkoqarluni ataatsimut isigalugu eqqaartuussiviup suleriaasianut paatsiveerussataaginnassaaq.

Kalaallit Nunaata Politiivinit inassutigineqassaaq inatsimmi aalajangersakkat kapitel 37-mut naapertuuttut erseqqissarneqassasut. Tamanna ilaatigut pisinnaavoq inatsisissap qallunaat aalisarnermi inatsisaata § 131, imm. 2, aammalu § 135 (lbk. nr. 261, 21. marts 2019-meersoq) oqaasertaanut naleqqussarneratigut. Tamatuma aamma kinguliini § 41-mi oqaasertaliunneqartut eqqarsarnartuinut naleqqutissagaluarpoq.

Ilanngullugu oqaatigineqassaaq nakkutilliisussaataaasup piginnaatitaanemik atorunnaarsitsinermik/arsaarinninnissamik aalajangernerup naammagittaalliutigineqarsinnaanerata annertussusaa naapertorlugu, Kalaallit Nunaata Politiivi isumaqarput, annertussutsimik kissaateqarneq naapertorlugu, eqqaartuussisussaataaasoq tassaassammak suliamik eqqaartuussivimmuut ingerlatitsisusaaq, allamik uniffeqarani paasissutissat naliliiniarnermi pisariaqartut ilanngullugit, suliassamik maanga nassiussisusaaq . Tamatuma kingorna eqqaartuussiniarnermi suleriuseq naapertorlugu nalunaaquttap akunneri 3x24 piffissarititaasut, § 422, imm. 3 naapertorlugu eqqaartuussisup, suliassaq Namminersorlutik Oqartussanit tigungeraniit, ingerlateqqissavaa. Matumani oqaatigineqassaaq eqqaartuussisussaataaasup nammineq suliaq, piginnaatitaaffimmik atorunnaarsitsinerussanersoq/arsaarinninnerussanersoq nalilersussammagu. ilanngullugu oqaatigineqassaaq, taarsiivigineqarnissamik piumasaqaatit assigisaalu Namminersorlutik Oqartussat piginnaatitaaffiagaanissamik/arsaarinninnissamik piumasaqaataanut attuumassuteqartut, politiit susassarinnngimmatigut, a a m m a l u N a m m i n e r s o r l u t i k O q a r t u s s a n i s u l i a r i n e q a r n i s s a a t i n n e r s u u s s u t i g i n e q a s s a m m a t , p o l i t i i n u t p i u m a s a q a a t a a s s a g a l u a r p a t .

§ 41-mut tunngatillugu

§ 41-mut tunngatilugu oqaatigineqassaaq, siuliini oqaaserineqartut eqqarsaatigalugit, ilimagiakku, pinngitsaalilluni naammassinninniarnermi, akiliisitsinermi assigisaanilu, maleruagassat nalinginnaasut atorneqarumaartut.

Oqaatigineqassaaq politiit – aalajangerneq naapertorlugu akiliisitsinermik assigisaanilluunniit naammassiissagunik, takuuk eqqartuussiveqarnermi inatsimmi § 597, imm. 3, tamanna eqqartuussiveqarnermi Inatsit naapertorlugu ingerlanneqassamat. Uanilu oqaatigineqassaaq periarfissaqanngimmat pineqartoq, politiit akiliisitsinissamik assigisaanillu aalajangernerannik, eqqartuussivimmuut ingerlatitseqqissinnaaneramik. Politiit aalajangernerata annertussusaa naapertorlugu tamanna allaffissornikkut Inatsiseqarnermut Naalakkersuisoqarfimmuut ingerlateqqinneqarsinnaavoq.


§§ 42 aammalu 43

Kalaallit Nunaata Politiivisa paasisimavaat, Inatsiseqarnermi Naalakkersuisoqarfik siusinnerusukku itimmikkut ittumik, ”allaffissornikkut akiliisitsiniarnermi”, Naalakkersuisut akiliisitsiniarnermi piginnaatitaaffiinu tunngatillugu, aalajangersakkanut oqaasertaliussat ilanngullugit, tusarniuteqartoqarsimasoq. Taannalu innersuussutigineqarpoq.

Med venlig hilsen



Line Mika Skov  
Sekretariatschef



Simone Morsing  
Juridisk fuldmægtig



Aalisarnermut. Piniarnermut Nunalerinermullu Ataatsimiititaliaq

Maani/

**Aalisarnermut, Piniarnermut Nunalerinermullu Ataatsimiititaliap Inatsisartut piniarneq aallaaniarnerlu pillugit inatsisissatut siunnersuummut atatillugu apeqquteqaataannut akissuteqaatit**

Dato: 16-03-2023  
Sags nr.: 2023 - 5778  
Akl. nr.: 22775823

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apn@nanoq.gl  
www.naalakkersuisut.gl

Ataatsimiititaliap apeqquteqaataanut qujavunga. Aalisarnermut, Piniarnermut Nunalerinermullu Ataatsimiititaliaq marsip 9-ani 2023 piniarneq aallaaniarnerlu pillugit inatsisissamut siunnersuummut tunngasunik aappassaaneerseqartinnagu apeqquteqarpoq, akissuteqaatillu allakkami tulleriinneri malillugit akineqarlutik.

## **I. Najugaqavissuunissamut piumasaqaat (§ 7, § 10 aamma § 14)**

### **a) Avataaniit tikittunit qassit piniarnermut allagartartaasimappat?**

Akissut: Piniarneq aallaaniarnerlu pillugit Inatsisartut inatsisaat (UPA23/170) pillugu siunnersuummi § 7 Inuussutissarsiutigalugu piniarsinnaanermut allagartamut tunngassuteqarpoq, § 10 Inuussutissarsiutigalugu aamma sunngiffimmi aallaaniarsinnaanermut allagartamut immikkut akuersissuteqarsinnaanermut tunngavoq, kiisalu § 14 piniakkanik killilersukkanik sunngiffimmi piniarsinnaanermut aallaaniarsinnaanermullu akuersissuummut tunngalluni.

Taakku tamarmik immikkooruteqarput immikkoortillugillu akissavavut.

Akissuteqaammi uani nunaqavissut avataaneersullu immikkoortikkuminaapput, tassami Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersumi Kalaallit Nunaanni najugalittut inuit nalunaarsorsimaffiannut nalunaarneqarsimaneq (najukkamik nalunaaruteqarsimaneq) aammalu Kalaallit Nunaanni najugalittut inuit nalunaarsorsimaffiannut nalunaarneqarsimannginneq (najukkamik nalunaaruteqannginneq) apeqqutaatinneqarmata.

Inuussutissarsiutigalugu piniarsinnaanermut allagartamik inuit avataaneersut, tassa nunatsinni najugaqanngitsut allagartartaarsinnaanngillat, tassa ilaatigut nunatsinni ukiuni marlunni sivikinnerpaamik najugaqarsimanissaq piumasaqaataavoq, takuuk Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersoq, § 4, imm. 2, nr. 1-4. Immikkut akuerineqarnissamut qinnuteqartoqarsinnaavoq, qinnuteqartup Kalaallit Nunaannut attuumassuteqarnera aallaavigalugu tamanna naapertuuttutut isigineqarpat, qinnuteqartorlu ilinniarnermik assigisaanilluunniit pissuteqartumik Kalaallit Nunaata avataaniikkallarsimappat, takuuk § 4, imm.4. Tamannali qaqtigoortorujussuuvoq.

Immikkut qinnuteqartartut tasaanerusarput § 4, imm. 4, tassa piniarnermit, aallaaniarnermit aalisarnermillu isertitaqartunut isertitat tamarmiusut ikinnerpaamik 50%-iisa nalinginik isertitaqarnissamut piumasaqaammit immikkut akuersissuummik qinnuteqarneq.

Inuussutissarsiutigalugu piniarsinnaanermut allagartamut immikkut akuersissutilit 2022-mi 116-iupput.



Sunngiffimmi aallaaniarsinnaanermut allagartamut tunngatillugu avataaniit tikittut nunatsinni najugaqalersimasut sunngiffimmi aallaaniarsinnaanermut allagartamik kommunemut qinnuteqarsinnaapput allagartamillu tunineqarsinnaallutik, takuuk § 4, imm. 3. Tassanilu piunasaqaataavoq nunatsinni najugalittut inuit nalunaarsorsimaffiannut nalunaarneqarsimasutut allassimanissaat.

Taakku sunngiffimmi aallaaniarsinnaanermut allagartallit allat peqatigalugit allat-torsimaffimmiippat, tassa ukioq 2022-mi 5.703-iupput.

Nunatsinni najugaqarani sunngiffimmi aallaaniarsinnaanermut immikkut ittumik akuersissummik qinnuteqartoqarsinnaavoq, takuuk § 4, imm. 4. Tunineqarsinnaallunilu qinnuteqartup Kalaallit Nunaannut attuumassuteqarnera aallaavigalugu tamanna naapertuuttutut isigineqarpat, qinnuteqartorlu ilinniarnermik assigisaanilluunniit pissuteqartumik Kalaallit Nunaata avataaniikkallarsimappat. Nunatta avataani najugalit qinnuteqartartut tassaanusarput SIRIUS patruljemi Station Nordimilu sulisut kiisalu nunatsinneersut Danmarkimi ilinniartut.

2022-mi sunngiffimmi aallaaniarsinnaanermut allagartamik immikkut akuersissummik tunineqartut 31-upput.

Piniakkanik killilersukkanik sunngiffimmi piniarsinnaanermut aallaaniarsinnaanermullu akuersissutit kommuninit tunniunneqartarput, akuersissutillu taakku inunnut Kalaallit Nunaanni najugalittut inuit nalunaarsorsimaffiannut nalunaarneqarsimasunut qinnuteqarnikkut tunniunneqarsinnaapput, qinnuteqarfissaq sioqqullugu Kalaallit Nunaanni najugalittut ukiuni qaangiuttuni marlunni nalunaarsorneqareersimasunut, takuuk § 5. Ukiut marluk ataallugit nunatsinni najugaqarsimasunut piniakkanut killilersukkanut sunngiffimmi piniarsinnaanermut aallaaniarsinnaanermullu akuersissummik tunniussisoqarsinnaanngilaq.

*b) Avataaniit tikittunit ukiut marluk qaangiutereerneraniit qassit piniarnermut allagartartaartarpat?*

Akissut: Nunatta avataaneersunik inuussutissarsiutigalugu piniarsinnaanermut allagartamik ukiut marluk sinnerlugit nunatsinni najugaqareernerminni qinnuteqartartut amerlassusii ilisimaneqanngillat. Sumi inunnorsimaneq apeqqutaatinnagit piniarnermut allagartartaarnissamut piunasaqaatinik naammassinnittut inuussutissarsiutigalugu piniarsinnaanermut allagartartaarsinnaasarput. Taamaattumillu immikkut kisitsisaatiginngilavut.

Piniakkanik killilersukkanik sunngiffimmi piniarsinnaanermut aallaaniarsinnaanermullu akuersissutit kommunimit suliarineqartarput, taakkulu APN-imi kisitsisaatiginngilavut.

*c) Nunaqavissut avataaneersullu qassit piniarnermut allagartartaartarpat?*

Akissut: Nunaqavissut, tassa nunatsinni najukkaminik nalunaarsorsimasut, inuussutissarsiutigalugu piniarsinnaanermut allagartallit 2022-mi 1.650-iupput. Taakkualu saniatigut inuussutissarsiutigalugu piniarsinnaanermut immikkut akuersissuteqarnikkut allagartallit 116-iullutik.

Avataaneersut, tassa nunatsinni najukkaminik nalunaarsoqqanngitsut, inuussutissarsiutigalugu piniarsinnaanermut allagartartaarsinnaanngillat.

## **2. Akiliisitsilluni piniariartitsisartutut akuersissuteqarneq (§ 18)**

*a) Akiliisitsilluni piniariartitsisartutut akuersissuteqalernissamut piunasaqaatit suuppat?*

Akissut: Kalaallit Nunaanni akiliisitsilluni piniartitsinissamut akuersissummik pissarsissagaanni piunasaqaatit naammassisariaqartut arlaqarput. Siullertut Kalaallit Nunaanni nunaqavissuusariaqarpoq. Kalaallit Nunaanni inatsisit malillugit inuussutissarsiornermik ingerlataqarsinnaanermut piunasaqaatinik naammassininnissaq aammattaaq piunasaqaataavoq. Uumasunik pineqartunik akiliisitsilluni piniartitsinermik ingerlataqarsinnaanermut uppersaateqarnissaq aamma piunasaqaataavoq, soorlu pikkorissarnerit imaluunniit ilinniarnert naleqquttut naammassisimanissaannut.

*b) Avataaniit tikittut qanoq amerlatigisut akiliisitsilluni piniariartitsisartutut akuersissuteqarpat?*

Akissut: Akiliisitsilluni piniartitsinermut akuersissuteqartut ingerlasut tamarmik Kalaallit Nunaanni nunaqavissuupput.

*c) Nunaqavissut akiliisitsilluni piniariartitsisartutut akuersissuteqarnissamut immikkut isiginiarneqartalernissaannut Naalakkersuisut pilersaaruteqarnerlutik?*

Akissut: Apeqqut 2-mut akissummi taaneqareersutut, Kalaallit Nunaanni nunaqavissuunissaq piunasaqaataavoq, taamaammallu maani nunaqavissut tamarmik inuit allattorsimaffianni allattorsimasuutigineqartut akiliisitsilluni piniartitsinissamut akuersissummik pissarsinissamut periarfissaqarput. Pisinnaaneq aamma misilittagaqarneq taamaallaat isiginiarneqartarput.

## **3. Pisanik tuniniaaneq nalunaarsuisarnerlu (§ 23)**

*a) Pisanik tuniniaanermi nalunaarsuinerlut malittarisassat qanoq isikkoqasappat, soorlu Facebookimi tuniniaanermi?*

Akissut: Siunnersuummi § 23 piginnaatitsinermik aalajangersagaavoq, piniakkanik killilersukkanik akuersissutitalimillu piniarneqartartunik tuniniaaneq pillugu Naalakkersuisunut malittarisassanik sukumiinerusunik aalajangersaanissamut periarfissiilluartoq. Piniakkanik akuersissutitalimmik piniarneqartartunik killilersukkanillu immikkut ittunik internetikkut tuniniaasinnaanerup killilersimaarnissaa, inerteqqutigitinneqarnissaa imaluunniit piffissani aalajangersimasuni tuniniaasinnaaneq assersuutaasinnaapput.

## **4. Piniagassanut uumasunut angallatit nunakkoortilluunniit motorillit minnerpaamik 500 meterinik ungasissuseqarfineqassapput (§ 26)**

*a) 500 meterinik ungasissuseqarnissamut piunasaqaat malillugu qaqugukkut piniarnermi qamuteralaat qimusserneq pinnagu atorreqarsinnaappat?*

Akissut: Nunami 500 meter-nik ungasissuseqarnissamut piunasaqaat nunaminertani tuttoqarfiusuni umimmaqarfiusunilu assartuutunik motorilinnik atuinnermut atillugu atuuppoq. Illoqarfiit nunaqarfiillu avataanni assartuutunik motorilinnik, soorlu qamuterallannik ATV-nillu, atuneq kommunini ileqqoreqqusaliornikkut malittarisassiuunneqartarpoq. Taamaammatt assartuutunik motorilinnik atuneq kommunimi ileqqoreqqussa malillugu taamaallaat nunaminertani taamaaliornissamut akuerisaasuni periarfissaavoq. Taamaattorli assersuutigalugu tuttunnarnermi umimmanniarnermilu assartuutunik motorilinnik atuinissaq qaquguk-kulluunniit inerteqqutaavoq.

*b) Qamuteralaat qimussillu pillugit malittarisassat sinaakkuteqartinneqarneri kommunit qanoq inissisimaffigivaat?*

Akissut: Illoqarfiit nunaqarfiillu avataanni motorilinnik atuneq sunaluunniit taaneqareersutuut kommunini ileqqoreqqusaliornikkut malittarisassiuunneqartarpoq. Qimuttunik qimmeqarfiusuni qimussimik atuinissaq tamatigut periarfissarsarpoq.

*c) 500 m-mik piunasaqaatip umimmannianiit peeqqunera, Naalackersuisut qanoq isumaqarfigaat?*

Akissut: Aalisarnermut Piniarnernullu Naalackersuisoqarfiup piniartuniit kissaatigineqartoq pillugu Pinngortitaleriffik oqaloqatiginikuuvaa. Pinngortitaleriffiup inassutigaa 500 meter-nik ungasissuseqarnissaq pillugu piunasaqaat peerneqassanngitsoq taamatullu allanngortinneqassanngitsoq, pissutigalugu uumasut motorillit nipituuliortarnerannut malussarissuummata taamaammallu neriniartarfiinniit pitsaaneriniit qimaatinneqartarlutik. Assartuutit motorillit tuttunut umimmannullu uippakajaartitsinermik kinguneqartarput.

*d) Umimmak aallaareeraanni, qamuterallannik ornillugu pilaatoqarsinnaavaa?*

Akissut: Umimmak pisarereerlugu aattorneqarnissaanik siunertaqartumik qanillisoqarsinnaavoq.

## **5. Pisap ilaannik qimatsiinnarneq (§ 26, imm. 6 aamma § 40, imm. 1, nr. 1)**

*a) "Pisap ilaannik qimatsiinnarneq" qanoq paasineqassava?*

Akissut: "Pisap ilaannik qimatsiinnarneq" pisap atorneqarsinnaasortaannik qimatsiinnarnertut paasineqassaaq, soorlu neqaa, mattaa, orsua aamma amia.

*b) Piniarfinni umiatsiamik ornittakkani tupeqarfinni eqqagassat uuliakullu qimaannakkat taassuma iluaniittutut paasineqassappat?*

Akissut: Naamik. Tupeqarfinni eqqagassat umiatsiamillu piniarnermut atillugu ornittakkani uuliakunik qimaannakkat kommunip suliassarigai inatsisini Nunalerinnermut, Imminut Pilersornermut, Nukissiuutinut Avatangiisinullu Naalackersuisoqarfiup oqartussaaffigisaani tunngaveqarput.

*c) Piniartut saleeqqaarneq ajortut piniarnermut allagartaannik arsaarneqarsinnaanerit Inatsimmut ilanngutissallugu periarfissaqarpa?*

Akissut: § 40, imm. 1, nr. 1, malillugu § 26, imm. 6-mik pisamik qimatsiinnarnermut tunngassuteqartumik unioqutitsisoqarnerani akiliisitsinermik pineqaatissiisuteqarnissamut periarfissaqarpoq. Pisuni ilungersunartuni § 40, imm. 4, malillugu akuersissummi piumasaqaatinik unioqutitsisoqarnerani akuersissut atorunnaarsinneqarsinnaavoq. Tamanna taaneqareersutuut piniarnermut tunngasunut taamaallaat atuuppoq, pissutigalugu eqqagassalerineq kommuniq suliaassarimagu Naalackersuisoqarfimmiillu allamik oqartussaaffigineqarmat inatsit alla tunngavigalugu.

#### **6. CVR/GER normut atorngit CPR-normut piniartunit atorqartarneri:**

*a) Pisaqarnermi CVR GER normunillu atuneq pillugu Naalackersuisut erseqqissaasinnaappat?*

Akissut: CVR tassaavoq Qitiusumik Suliffeqarfinnik Nalunaarsuiffik tassaallunilu naalagaaffiup suliffeqarfiit pillugit tunngaviusumik paasissutissanik nalunaarsuiffia, tamannalu suliffeqarfiit CVR-mut nalunaarsorsimasut pillugit paasissutissanik tamanik imaqarpoq. CVR-normu tassaavoq suliffeqarfiup kinaassutsimik normua, soorlu innuttaasut tamarmik CPR-normuqartut.

CVR-normu kisitsinik arfineq-pingasunik imaqarpoq suliffeqarfimmullu pineqartumut atuuppoq asseqarani, normulu pineqartoq pisuni tamani suliffeqarfimmit pisortanut oqartussaasunut, sullitanut, SKAT-mut il. il., kinaassutsimik takutitsiffiusariaqartuni tamani atorqartoq. CVR-register-imut nalunaarsorsimanissap taamaalilluni siunertaraa inuussutissarsiummik suliffeqarfiup kinaassutsimik uppersarneqarsinnaanissaa.

Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat nr. 33, 28. november 2016-imeersoq malillugu Kalaallit Nunaanni inuussutissarsiummik ingerlatsisut tamarmik CVR-mik nalunaarsuiffimmi nalunaarsorneqarsimanissaat piumasaqaataavoq. Ilangullugu oqaatigineqassaaq inuup ataatsip suliffeqarfiutaa CVR-mik nalunaarsuiffimmi nalunaarsorneqarnissaat akeqanngimmat.

*b) CVR GER normullu atorunnaarlugit CPR normut atulissappat?*

Akissut: Naamik. CPR-normut inunnit privatinit atorqartarput CVR-normut suliffeqarfinnit atorqartarput.

**7. Aallaaniarsinnaanermut misilitsinneq, eqqiluisaarnermut pikkorissaanerit allallu:**

*a) aallaaniarsinnaanermut misilitsissinnaaneq (§19) eqqiluisaarnermullu pikkorissaanerit (§24, imm. 5) Naalackersuisut qanoq piviusunngortinniarpaat?*

Akissut: Aallaaniarsinnaanermut misilitsissinnaaneq pineqartillugu maannakkut Naalackersuisut misilitsissinnaanerup piviusunngortinnissaanut pilersaaruteqarfiginngilaat aningaasaliiffigineqarnikuunngimmat. Taassuma saniatigut suliassaq sulisussaqaartinneqanngilaq, aamma allaffissornermik, Namminersorlutik Oqartussani kommunenilu sulisunik ilinniartitseqqaarnissamik kiisalu aserfallatsaalinnissaq aammalu piffissami ineriartortinnissaa pisariaqassamat. Malittarisassap atuutilersinneqarneratigut kommuneni Namminersorlutik Oqartussanilu allaffissorneq aningaasartuutillu annertusissapput. Taamaattumik aappasaarinissamat atatillugu Naalackersuisut isumaliuutigaat malittarisassap pineqartup peerneqarnissaa. Aalajangersagaq maanna inatsimmi atuuttumi ingerlatitseqqiinerugaluarpog.

Eqqiluisaarnermut pikkorissaanerit INULI aqqutigalugu inunnut pisariaqartitsisunut neqeroortigineqartarpoq, suliap ingerlanneqarnissaa INULI-mut suliakkiutaanikummat. INULI-llu suliassaqarfissaa ilaanniippoq, taamaattorli peqataasut ikinnerpaaffeqarnissaanut piimasaqaat pikkorissaanissamat neqeroortoqarnerani atuuppoq.

#### **8. Piniarnermut nakkutilliisoqarneq:**

*UKA2022-mi piniarnermut aalisarnermullu nakkutiginninneq Naalackersuisunit tamakkiisumik periusissamik aamma suliassamat pilersaarusiamik aallartitsinissaannut aalajangiiffigineqarput kingusinnerpaamillu UKA2023-mi Inatsisartunut nassiunneqassalluni.*

*a) Suliassamat pilersaarut sumut killippa?*

Akissut: KANUAANA tamakkiisumik periusissamik aamma suliqaarnissamik naliliinermik ingerlataqarpoq. Inatsisartut ukiakkut ataatsimiinneranni tamanna tunniunneqassaaq, soorlu isumaliutissiissummi Aalisarnek, Piniarneq Nunalerinerlu pillugit Ataatsimiititaliamit 31. oktobarimi 2022-mi tunniunneqartumi takuneqarsinnaasoq.

*b) Piniarneq aallaaniarnerlu pillugit inatsisip nutaap naammassineqarnissaa suliassanut pilersaarummi sillimaffigineqarsimava?*

Akissut: Aap, suliassamat pilersaarummi piniarneq aallaaniarnerlu pillugit inatsisip nutaap sillimaffigineqarpoq.


*c) Piniarnermut aallaaniarnermullu nakkutilliisoqarnissamat inatsisip nutaap pitsaanerpaamik atuutsilernissaa Naalackersuisut qanoq qulakkeerniarpaat?*

Akissut: Immikkoortoq b-mi akissuteqaat takuuk.

Ataatsimiititaliamut ilisimatitsissutigissavara Naalackersuisut ileqqutoqqamat perngartitsinermut tunngasumik malittarisassamik siunnersuuteqalersaarmata

piniakkat killilersukkat ilaat aammalu killilersugaanngitsut pillugit. Soorlu assersuutitut tuttumik timmissamilluunniit perngarneq. Malittarisassamik tassunga tunngasumik siunnersuummik suliaqartoqareerpoq. Allanguutissatullu siunnersuuteqarneq pissaaq inatsisissamut siunnersuutip aappassaarneqarneranut atatillugu. Aappassaaneerinissamut akissutit ilaattut ilanngullugu Naalakkersuisut saqqummiutilersaarpaat.

Inussiarnersumik inuulluaqqusillunga



Karl Tobiassen

Aalisarnemut, Piniarnemullu Naalakkersuisoq